



## **Eugen Groth**

09.05.1953 - 27.07.2007

Eugen Groth ei naschius sco feagl da Karl ed Anne-Marie Groth-Tschümperlin a Cuera ils 9 da matg 1953 . El ei carschius si a Sedrun cun ses fargliuns Charly, Evelin, Hedi e Kurt. Suenter las scolas eis el serendius a Turgi e fatg igl emprendissadis sco fravi d'utensils. Duront ses onns da giuventetgna plein veta e travaglia ha el luvrau tochen 1980 sco tschentafier. Igl onn 1974 ha el empriu d'enconuscher sia dunna, la Helen ed

ei maridau 1976. Cu il feagl Daniel e la figlia Monica ein stai naschi ha Eugen encuretj ina nova sfida tier PSI Villingen.

Gia els giuvens onns ha Eugen adina puspei giu il desideri da far viadis cun sia famiglia. Las vacanzas da stad passentavan els ensemen giu l'Italia sper l'Adria ni allas bialas rivas dalla Sardegna. Sco um dils cuolms eran il cauld sulegl e rivas pigl Eugen empau zatgei jester. Propi bein sesenteva el plitost igl unviern. Duront la freida sesiun carmalava sia patria adina puspei anavos el a Sedrun. El deva gronda peisa ch'era ses affons survegnien ina relaziun tier ils cuolms ed il sport d'unviern ed aschia mussau ad els ella vegliadetgna da 3 onns dad ir cun skis.

Culs affons ein stai empau carschi ein Eugen e Helen serendi mo en dus en vacanzas. Els encurevan igl equilibr d'aur, la riva per Helen, ils cuolms per Eugen. Per casualitad han els empriu d'enconuscher Gersau ch'ei daventaus lur liug da vacanzas preferiu. Bia ga ha Eugen dau da sentir ch'els setilien en quei bi liug suenter la pensiun. Gersau era in punct da partenza per bia bialas spassegiadas. Igl onn 2003 ha Eugen e Helen fatg ensemen igl examen d'ir cun barca a motor. Aschia han els priu la caschun d'enconuscher meglier il Lag dils quater Cantuns.

Gia els giuvens onns carrava igl Eugen bugen cun siu velo a motor. Fundau la famiglia haveva el denton decidiu da metter quei hobi per in liung temps d'ina vart. Denton cun l'annunzia dalla primavera nescheva adina puspei il desideri

dallas turas sur ils pass e viers sia patria. Sil motor savevi el emblidar il contuorn sco el raquintava tut fascinaus. Sin natalezi haveva la feglia lu giu schenghegiau ina tura a motor sin la quala igl Eugen ha era schau seser ella. L'emprema carra da fallombra suenter liung temps ha denton puspei tschaffau igl Eugen. Quei ha motivau el igl onn sissu da puspei metter neu in agen «Töff». La fin d'jamna cura che sia dunna haveva da luvrar visitava el stediamein siu vitg nativ e quei cun cumbinar la carrada sur ils pass vischinonts.

La cuntrada muntagnarda ha adina puspei fascinau igl Eugen. A Tujetsch ha el ascendiu bein enqual cuolm ensemen cun sia dunna e ses dus affons. Principalmein il temps d'atun nezegiava el ils aults per temps da vacanzas. Schizun enqual regla da reiver haveva Eugen mussau a ses affons viandond da tegia tier tegia. Far attents il feagl sin prighels cun mussar reglas da segirtad, seigi quei cun reiver ni carrar cun motor, quei plascheva agl Eugen. Bab e feagl han perfin dumi-gnau il Mönch, sin 4000m.s.m. igl onn 2004. Il cuolm haveva svegliau agl Eugen tons sentiments ch'igl ei semadirau eifer ils davos onns il giavisch d'eleger il Mönch sco davos liug da ruaus.

Tragicamein ha gest in dils hobis da Eugen purtau il destin e sdrappau anetga-mein sia veta da quest mund terrester. Ils 27 da fenadur haveva Eugen previu da far ina viseta en siu vitg natal a Sedrun. Plein tschaffen semetta el sin viadi e cumbinescha la tura cun traversar las vals dil Tessin. In accident a Faido nua che Eugen ha giu negina cuolpa piarda el sia veta sin moda tragica.

Eugen, ruaussa en pasch!